

Āo, Khud Dekh Lo



āo, khud dekh lo

Come, See for Yourself

by Bakhtullah

[Ao, Khud Dekh Lo 3]

(Urdu—Roman script)

© 2022 www.chashmamedia.org

published and printed by

Good Word, New Delhi

The title cover is a collage including
OpenClipart-Vectors <https://pixabay.com/images/id-2026191/>.

Bible quotations are from UGV.

for enquiries or to request more copies:
askandanswer786@gmail.com

Fahrist

Kyā Mainne K̄hud Ākar Dekh Liyā Hai?	2
Kyā Main Us ke pīchhe Ho Liyā Hūn?	5
Kyā Main Us kā Ghar Wālā Ban Gayā Hūn?	6
Kyā Masīh Merā Bādshāh Hai?	8
Injīl, Yūhannā 1:35-51	11

Ek din kā zikr hai ki ek nāsamajh laṛkā nahr
meñ nahāte hue phisal gayā aur ḍūbne lagā.
Us ke sāthiyon ke dekhte dekhte wuh shor
machāte hue pānī kī gahrāiyon meñ ojhal ho
gayā. Lekin ek dost se rahā na gayā. Us ne pānī
meñ chhalāñg lagāyā. Aur sachmuch thoṛī der
bād wuh dost ko pakaṛkar nikāl lāyā.

Be-chārā laṛkā! Wuh be-his-o-harkat kināre par
paṛā rahā. Kyā us kā dam nikal chukā thā?
Us ke yār-dost pareshān hālat meñ us ke gird
ikaṭṭhe hue. Tab ek ne kahā, “Ṭhahro, pahle
ham phephaṛon se pānī nikālte haiñ phir nabz
dekhte haiñ.” Wuh jhukkar kāfī der tibbī imdād
dene meñ lagā rahā. Phir uṭh khaṛā huā aur
kahā, “Bahut hī kamzor hai. Lekin zindā hai.
Halkī halkī sāñs le rahā hai.” Hālāñki bilkul be-

jān lag rahā thā. Na ṭhīk taur se marā huā thā, na zindā.

Kitne logoñ kī yahī hālat hotī hai. Dhyān se dekho tab hī patā chaltā hai ki zindā haiñ. Lag rahā hai ki wuh nahr ke kināre adhmue paṛe haiñ. Be-his-o-harkat. Wuh bas guzārā kar rahe haiñ. Un kī zindagī kā koī maqsad, koī mazā nahīn rahā. Dekhne meñ zindā hote haiñ magar haiñ hī murde.

► *Āp kī zindagī kaisī hai? Kyā wuh bharpūr aur bāmaqsad hai? Agar nahīn to ham kyā kar sakte haiñ ki hamārī jān meñ dubārā jān āe?*

Bharpūr zindagī pāne ke lie hameñ kuchh sawāl pūchhne chāhieñ. Pahlā sawāl:

Kyā Mainne Kḥud Ākar Dekh Liyā Hai?

Ek wāhid hastī hai jis se hamārī jān meñ jān ā saktī hai—wuh jo Īsā Masīh kahlātā hai.

Ek din Īsā Masīh Yahyā Nabī ke pās āyā. Yahyā Nabī ne use dekhte hī apne shāgirdoñ ko batāyā

ki yih Masīh hai. Yih wuhī hai jo duniyā ke gunāhoñ ko uṭhā le jāegā.

► *Kyā yih sunkar shāgirdoñ ko samajh āī ki Īsā Masīh kaun hai?*

Nahīñ. Lekin itnā wuh samajh gae ki yih ek ḵhās aur azīm ādmī hai.

Andhere meñ parwānā āg se khīñchā jātā hai. Wuh majbūr ho jātā hai chāhe wuh us meñ jal bhī jāe. Shāgird parwānoñ kī tarah Īsā Masīh ke pīchhe pīchhe khichte gae.

Us ne muṛkar un se pūchhā, “Tum kyā chāhte ho?”

► *Āj Īsā Masīh yih kuchh mujh se aur āpse bhī pūchhtā hai: Tum kyā chāhte ho?*

► *Āp kyā jawāb denge?*

Āp bare hoñ yā chhoṭe, mard hoñ yā aurat, wuh har ek se yih sawāl pūchhtā hai. Kyā āp kahaenge ki “Mujhe chhoṛ do. Paighambar ho na ho magar merā āpse kyā wāstā. Merī to alag party hai.”

► *Apne āp ko dhokā mat denā. Roz-e-mahshar par āp kyā kaheṅge jab āp ko taḡht-e-adālat ke sāmne lāyā jāegā?*

Shāgirdoṅ ne aisī koī bāt na kī. Unhoṅ ne sāf pūchhā, “Ustād, āp kahān ṡahre hue haiṅ?”

“Ustād.” Un ko itnā hī patā thā: Masīh hamārā ustād hai. Wuh ustād jis se hamārī jān meṅ jān āegī aur āsmān kā rāstā khul jāegā. Isī lie ham wahān jānā chāhte haiṅ jahān wuh ṡahrā huā hai.

Īsā Masīh ne jawāb diyā, “Āo, ḡhud dekh lo.”

Kitnī ḡhūbsūrat dāwat! Wuh majbūr nahīn kartā. Khulī dāwat hai ki āo aur ḡhud patā kar lo. Tab tum jān loge ki main kaun hūṅ.

Donoṅ shāgird Masīh ke hān pahuṅche. Shām ke chār baj gae the. Unhoṅ ne kyā kyā dekh liyā hogā? Kyā wuh pūrī rāt bāteṅ karte rahe? Ho saktā hai ki ustād kā muhabbat-bharā chehrā hī kāfī thā. Jo bhī huā, yih shāgird ekdam Īsā

Masīh se lipaṭ gae. Ab se wuh us ke hān ṭhahre rahe.

Īsā Masīh ke pīchhe ho lene kā matlab yahī hai: Āo, kḥud dekh lo. Aur is se zyādā: Mere sāth ṭhahro. Matlab yih nahīn ki ham us kī party ke member baneñ. Use siyāsī bātoñ se saḡht nafrat hai. Nahīn, wuh chāhtā hai ki ham us ke ghar wāle ban jāeñ. Ki jahān wuh hai wahān ham bhī hoñ. Ki wuh hamārā āqā ho. Ham us kī āwāz sunen aur us kā hāth thāme hue chal pañen. Yoñ hī hameñ bharpūr zindagī miltī rahegī.

Islie merī aur āp kī zindagī kā sab se ahm sawāl yih hai:

Kyā Main Us ke pīchhe Ho Liyā Hūn?

Jab zabardast chaṭṭān samundar meñ gir jāe to baṛī baṛī lahren uchhalkar chāroñ taraf phail jātī haiñ. Jo bhī rāste meñ hai use wuh apne sāth le jātī haiñ. Īsā Masīh ke pās ṭhahrne se yahī kuchh huā. Wuh Masīh kī muhabbat-

bharī lahr meñ ākar itne josh meñ āe ki un se rahā na gayā. Un ko dūsroñ ko yih ḵhushḵhabrī batānā hī thā.

Donoñ meñ se ek kā nām Andriyās thā. Us kā dil ustād kī bātoñ se chhalak uṭhā to wuh sīdhe apne bhāī Patras ke pās jā pahuñchā. Kahā, “Hameñ Masīh mil gayā hai.” Wuh jo hameñ bachāegā. Yih kahte hī Andriyās apne bhāī ko ghasīṭkar Īsā Masīh ke pās le gayā. Bhāī bhī ekdam Masīh ke jādū meñ ā gayā.

Lahreñ abhī tak zoroñ par thīñ. Ab Īsā Masīh ek ādmī banām Filippus se milā. Us ne kahā, “Mere pīchhe ho le.”

► *Kyā main us ke pīchhe ho liyā hūñ?*

Tīsrā sawāl:

Kyā Main Us kā Ghar Wālā Ban Gayā Hūñ?

Filippus na sirf rāzī huā. Wuh itne josh meñ ā gayā ki sīdhe apne jānane wāle Natanel ke pās pahuñchā. Kahne lagā, “Hameñ wuh mil gayā

jis kā zikr Mūsā aur nabiyon ne kiyā hai. Wuh Nāsarāt kā rahne wālā hai.”

Natanel kī hañsī chhūṭ gaī, “Nāsarāt!? Kyā Nāsarāt se koī achchhī chīz nikal saktī hai?” Nāsarāt mein kam ābādī thī, aur use haqīr jānā jātā thā. Al-Masīh aisī jagah se kis tarah ā saktā thā?

Filippus ne jawāb diyā, “Ā aur khud dekh le.”

Filippus yih bāt samajh gayā thā ki āne aur khud dekh lene se hī sab kuchh mālūm ho jātā hai. Koī aur rāstā nahīn. Ghar kā rishtā bāndhnā hai. Yih to koī falsafā nahīn hai jo wuh kitāb parhkar mān saktā hai. Na kisī party ke office mein jākar apnā nām register karwānā hai. Ghar kā rishtā ghar ke andar hī bāndhā jātā hai. Ghar wālon ke āmne-sāmne.

► *Kyā main us kā ghar wālā hūn?*

Chauthā sawāl:

Kyā Masīh Merā Bādshāh Hai?

Īsā Masīh Natanel ko āte dekhkar pukār uṭhā, “Lo, yih sachchā Isrāīlī hai jis meñ makr nahīn.” Natanel hakkā-bakkā rah gayā. “Āp mujhe kahān se jānte haiñ?”

Īsā Masīh ne jawāb diyā, “Is se pahle ki Filippus ne tujhe bulāyā mainne tujhe dekhā. Tū anjīr ke daraḡht ke sāy meñ thā.”

Kyā bāt hai! Is se pahle ki ham use dekheñ Īsā Masīh hamēñ pukārkar farmātā hai ki “Āo aur ḡhud dekh lo.”

Natanel bhī Masīh kī muhabbat-bharī lahr meñ ā gayā. Us meñ ḡube hue wuh pukār uṭhā, “Ustād, āp Allāh ke Farzand haiñ, āp Isrāīl ke bādshāh haiñ.”

Īsā Masīh ne farmāyā, “Achchhā, merī yih bāt sunkar ki mainne tujhe anjīr ke daraḡht ke sāy meñ dekhā tū imān lāyā hai? Tū is se kahīn baṛī bāteñ dekhegā. Main tum ko sach batātā hūñ ki tum āsmān ko khulā aur Allāh ke

farishton ko ūpar chaṛhte aur Ibn-e-Ādam par utarte dekhoge.”

► *Ham yih mushkil bāt kis tarah samajh sakte haiñ?*

Qadīm zamāne meñ Isrāīl ke buzurg Yāqūb ne ḵhāb meñ ek sīrhī dekhī thī jo zamīn se āsmān tak pahunchtī thī. Farishte us par chaṛhte aur utarte nazar āte the. Rab us ke ūpar khaṛā thā. Likhā hai,

Tab Yāqūb jāg uṭhā. Us ne kahā, “Yaqīnan Rab yahāñ hāzir hai, aur mujhe mālūm nahīn thā.” Wuh ḍar gayā aur kahā, “Yih kitnā ḵhaufnāk maqām hai. Yih to Allāh hī kā ghar aur āsmān kā darwāzā hai.”

(Taurāt, Paidāish 28:16-17)

Īsā Masīh apne shāgirdon ko batānā chāhtā hai ki ab tum bhī mere wasīle se dekhoge ki āsmān kā darwāzā insān ke lie khul jāegā.

Ek aur bāt. Īsā Masīh ne apne āp ko Ibn-e-Ādam kahā.

► *Kyon?*

Dāniyāl Nabī ne sadiyon pahle al-Masīh ke bāre mein ek royā dekhī thī. Us mein us ne dekhā thā ki

Āsmān ke bādalon ke sāth sāth koī ā rahā hai jo Ibn-e-Ādam-sā lag rahā hai. Jab Qadīmūl-aiyām ke qarīb pahuñchā to us ke huzūr lāyā gayā. Use saltanat, izzat aur bādshāhī dī gai, aur har qaum, ummat aur zabān ke afrād ne us kī parastish kī. Us kī hukūmat abadī hai aur kabhī khatm nahīn hogī. Us kī bādshāhī kabhī tabāh nahīn hogī. (Dāniyāl 9:13-14)

Īsā Masīh yahī Ibn-e-Ādam hai jo ek din duniyā kī adālat karne āegā. Us kī bādshāhī kabhī tabāh nahīn hogī. Wuhī har insān kā

Ḳhudāwand hai chāhe wuh yih bāt māne yā na māne.

Yon Īsā Masīh kī ḳhidmat shurū huī. Aur yih ḳhidmat āj tak jāri rahī hai. Āj tak wuh bār bār pukārtā rahtā hai: Āo, ḳhud dekh lo! Āo, ḳhud dekh lo!

► *Rahā yih sawāl: Kyā main ne us ke huzūr ākar ḳhud dekh liyā hai?*

Injīl, Yūhannā 1:35-51

Agle din Yahyā dubārā wahīn kharā thā. Us ke do shāgird sāth the. Us ne Īsā ko wahān se guzarte hue dekhā to kahā, “Dekho, yih Allāh kā lelā hai!”

Us kī yih bāt sunkar us ke do shāgird Īsā ke pīchhe ho lie. Īsā ne muḳkar dekhā ki yih mere pīchhe chal rahe haiñ to us ne pūchhā, “Tum kyā chāhte ho?”

Unhoñ ne kahā, “Ustād, āp kahāñ ṭhahre hue haiñ?”

Us ne jawāb diyā, “Āo, ḵhud dekh lo.” Chunāñche wuh us ke sāth gae. Unhoñ ne wuh jagah dekhī jahāñ wuh ṭhahrā huā thā aur din ke bāqī waqt us ke pās rahe. Shām ke taqrīban chār baj gae the.

Shamāūn Patras kā bhāī Andriyās un do shāgirdoñ meñ se ek thā jo Yahyā kī bāt sunkar Īsā ke pīchhe ho lie the. Ab us kī pahlī mulāqāt us ke apne bhāī Shamāūn se huī. Us ne use batāyā, “Hameñ Masīh mil gayā hai.” (Masīh kā matlab ‘masah kiyā huā shakhs’ hai.) Phir wuh use Īsā ke pās le gayā.

Use dekhkar Īsā ne kahā, “Tū Yūhannā kā beṭā Shamāūn hai. Tū Kaifā kahlāegā.” (Is kā Yūnānī tarjumā Patras yānī patthar hai.) Agle din Īsā ne Galīl jāne kā irādā kiyā. Filippus se milā to us se kahā, “Mere pīchhe

ho le.” Andriyās aur Patras kī tarah Filippus kā watanī shahr Bait-saidā thā.

Filippus Natanel se milā, aur us ne us se kahā, “Hameñ wuhī shakhs mil gayā jis kā zikr Mūsā ne Tauret aur nabiyoñ ne apne sahīfoñ meñ kiyā hai. Us kā nām Īsā bin Yūsuf hai aur wuh Nāsarāt kā rahne wālā hai.”

Natanel ne kahā, “Nāsarāt? Kyā Nāsarāt se koī achchhī chīz nikal saktī hai?”

Filippus ne jawāb diyā, “Ā aur khud dekh le.”

Jab Īsā ne Natanel ko āte dekhā to us ne kahā, “Lo, yih sachchā Isrāīlī hai jis meñ makr nahīñ.”

Natanel ne pūchhā, “Āp mujhe kahāñ se jānte haiñ?”

Īsā ne jawāb diyā, “Is se pahle ki Filippus ne tujhe bulāyā mainne tujhe dekhā. Tū anjīr ke daraḡht ke sāy meñ thā.”

Natanel ne kahā, “Ustād, āp Allāh ke Farzand haiñ, āp Isrāīl ke bādshāh haiñ.”

Īsā ne us se pūchhā, “Achchhā, merī yih bāt sunkar ki mainne tujhe anjīr ke daraḡht ke sāy meñ dekhā tū īmān lāyā hai? Tū is se kahīñ baṛī bāteñ dekhegā.” Us ne bāt jāṛī rakhī, “Main tum ko sach batātā hūñ ki tum āsmān ko khulā aur Allāh ke farishton ko ūpar chaṛhte aur Ibn-e-Ādam par utarte dekhoge.”